

Fedoroacha

letoai leinjiin

Inara coaaucaun.

1 ¹⁻²Canuna Jesocurisito letono afosoto Fedoro neeun. Inae jauriaalu caje coauneein coaauhalu cana Inaca Cana Coaunerane rijijieein nii niicha ranojoinequichene, Poonto, Galasia, Capadosia, Asia, Bitinia, naaonjoainuri batane que cuhin inara atane udaa riaaneein neinequichene raine caa quiricha laenaain letoaaun. Nitohaneein rai cachaneein naitoonjoan tonoraain neeichene coinata, jelai teein rai Suujue que inara suujue teein, Calaohi Jesocurisito coichana aina cuaain inara coulucohin inara raain nelu. Aihane jaun, jeelai amuritoheriin inara coroatajanemiin Cana Coaunera jiniiquiin raotojoeein neeichene coina.

Itolere bana canaacha cohajei ichaonaa

³Cairichaaajoaain cana coaraain, cana coreniha ohane baiha caje ichanaa Jesocurisitone aina cuaain, nacoauneein ena nejanoaain nena rijijieein nena jaun, cana Curuaanaa Jesocurisito Inaca Cana Coaunera coroaecaachenete ne. Nii Cana Coaunerate itolere bana canaacha cohajei ichaonaanaja tereein cana rai. ⁴Chaen techu aca inara que banihateein dedeeu Cana Coauneraacha rucujuei- nii

ichaonaa caohacha inaraacha cohajei tereein. Nii inara rai niicha teeni nii chatohaneein nitajena nainerinaain. ⁵Nitohaneein esinae rauhijiriin inara ichoteraterichaaain Cana Coaunerane esenetaain neeichene jaunte, niicha ichana nainei ichaain inara beraicheein, jianacoon neein nii inara ichoteraterichaaaine jaan que turuhichene, inara que banihateein niicha rucujuei coitucueratiha inae ecu tihane bana inara quene coina.

⁶Nitohaneein neriquicheeine jaunte, raotojoeein rachoojoeein neeiche ena, itolere que coujunojoeein cairichanojoeein neeichene nihanatiin. ⁷Charijieein teeinti usihanau oro teein mocoore caje mituha baasone coina, nii rijijieeinte inara netonai coujunojoeein neriquicheein. Inae nitohaneein coujunojoeein coanojoeinequichene jana, itolere necairichanaa abaantaain, inara sarunaa jeriha moconajaerane tonoraelanaala, itolere que laraajjin neeichenete, nii jataain coreti- nitaje rai nena oro amurijiriin nelateineein neriquicheein. Nitohaneein coujunojoeein neeichene abaantaain laraajjin neeichenete, coroaenojoeein neriquicheein inae turuha cana Curuaanaa Jesocurisitone bana.

⁸Coatilha niqiu charijibana Jesocurisito coaraain niheeiche inara. Nete coara rijitojoeein jataain belaaain

coroajeein rachoojoein neeiche. Chaen techu, “Naaonjoaan,” naain inara ere nejesinaacha que benaa nainiheeiche, jataain necaohachanaa nihane jaun.

⁹Nitohaneein inae ichoteratenojoein niha inara suujuene jaunte, raotojoein rachoojoein neeiche. Nitohaneein neeichene coinete Jesocurisito esenetaain neeiche.

¹⁰Nitohanihane coinete inoaenlu caje coauneen jianacoon cana ichoteraanu que cuaain caohachaaain coitucuuruhane coina que nerelaain, cairichaaajoaain cana coaraain ichoteratenojoi nichaachene jaanu terichaaain cana rai Cana Coaunerane beebejerejetecurelu *profetacuru*. ¹¹Nitohaneeinte inae jauriaalu caje coauneen *profetacuru* que coitucueratelu Jesocurisito Suujue, ateinaauruhane baiha nacoaauneen ichanaain rai caohacha icharaanu que tiha Cana Coaunerane coitucueratelu. Nii jaunte niqui: “Charijicha nii aicheein. Chatohanai banacha aicheein,” naain niqui coitucunaa jerecure, acaauru que coitucueratiha Cana Coaunera Suujuene jaun. ¹²Nete acaauru raineen nenerihani nii Cana Coauneraacha beratenojoi- inara rai caohachaneein neeninu coitucueratelu acaauru que Cana Coaunera. Nii jaunte nii ichoteratenojoein neeichene jaan, inae inara que coitucuerateure nii Ena Nena Cana Coaunera Ere beracuru dede caje letononeen nena Cana Coaunera Suujue aina cuaain. Niite niqui jataain caohatiin coaraain coitucunaa jerecurelu Cana Coaunera letono anjeraauru netonai.

**Esinae rauhijiriin aca jerihane
rijijiein ichaonaa coinete cana
cotijiaain ne Cana Coaunera.**

¹³Nitohanihane jaun jatoraaain niicha que coacuhin coujurihu inara suujua

coaraain, nacoauneen turuha uha Jesocurisitone jana inara rai Cana Coauneraacha tenaa jereiicha que jaaequiin neeuche. ¹⁴Coujuriu Cana Coaunera calaohineen nena tocohaneein naitoonjoan tonoraain neeuche. Jiaonriha jauriaalu Cana Coaunera coitucuelanaala inara suujua letono rijijiein ichaohichelune rijijiein ichaohichene. ¹⁵Nitohaneein ichoaelanaala, Cana Coauneraacha que banijiaaeneen saantoneen ichaaoche, nii inara cotihara acaihanejei Cana Coauneraacha Saantoneen nihane jaun. ¹⁶Nitohanihane jaunte rai Quiricha inoaensi cuhane: “Acaihanejei inara Coaunereen Saantoneen nihanune jaun, canu que banijiaeneen saantoneen leinjiin canuhacha cachaneein ichaaoche,” nae Cana Coaunera.

¹⁷“Cana Inaca Cana Coaunera,” naaiche Cana Coaunera quene jaun, aca chuni ichotelanaala canaacha ichai caje cana ichao coaraain rucuheraneein nihane coitucuhin esenetaain ichaohichene coarateen ichaaoche, jaiti cau chauratane que ichaonaa que neein.

¹⁸Inara foerateracuru ichao rijijiein nii chaque nelatelanaala nitaje rai nena ichaonaa que ichaohichene janate, inara ichoteratelu Cana Coaunera. Nii jaunte inara nii nitajerai nena oro, coriqui, naaonjoain que coretenohineniha nii inara ichaone raotojoein coitucuhiche. ¹⁹Nitohaneeinte caohatiin chaeloon baasoneerilanaala nena carenero narejeen sohin acaauru osa coreniha coichana terejotocuruhalu cana inoaensihurune rijijiein, nii chaeloon osaaojeejelanaala nena Jesocurisito sohin, coichana jataain necaohachaaain nena que coretenojoein ne nii inara ichao. ²⁰Inae nitohaneein cana coreniha orichaaaine

coinate jaiti necoauaeniha cana rai chauratanene ajiniha caje coauneen nesilu Cana Curuaanaa Jesocurisito. Nii jaunte inae ecu tihane jaun jeriha Cana Coaunerane jaun, nii bana inara caohachanu que ecocohin nelu.

²¹Jesocurisito aina cuaainte, nii oo caje ichateen rai caohacha icharaanu teraneen nena Cana Coaunera coitucuhin esenetaain neeiche. Nitohaneen inara coroatajaneraneen niha Cana Coaunerane jaunte, leinjiin acaacha cohajeen que jaaequiin neeiche.

²²Inae nitohaneen Cana Coaunera beratenojoi esenetaain tonoraain neeichene jaunte, inae couluunojoinneen ne inara suujue, jataain inara suujua aina cutaain jiniiquiin Jesocurisito ranojoinneen nenacaauru canejeraauru aina ita belaaain neeichene coina. Nitohaneen le cacha nequichene atiin ita acatiha tacaain, inara suujua aina cutaain ita belaaain neeuche, nii baaso coacuelanaala. ²³Eناة nacoauneen nejanoaain nena rijijieen neeiche. Coatiha cacha onaa inaeraneen nena jaberoco caje nii nejanoaheeiche. Cana Coaunera Ere chabana nitajena charanejeen satonoelanaala nena aina cuaainte nii nacoauneen nejanoaache. ²⁴Nitohanihane coinate: "Satiin cachate nejanoaain fojoeen ichauchenaneen inae biinaanihane ohe. ²⁵Nete laen Cana Coaunera ere nii charijibana satonoelanaala nereein," naain laenanohineen ne Cana Coaunera Quiricha cuhane. Nii inara rai beratenojoneen nena Erenaa esenetaaichene jaunte, inae ichoteratenojoneen neeiche.

2 ¹Inae nitohaneen ichoteratenojoneen neeichene coina, inara rai beratenojoin Erenaa esenetaaichene jaun, jauriaalu baasoneen ichaohin inara amute cacha cairichaa nohaneen, necoelajauhari-

tiin, inara amute cacha cotaairiichene nihanatiin belaiha rijitjoeen rai ereen neeichene coarateen neeichene jianeen neeuche. ²Aiha ena nejanoanaa canaanai ujuari, itaaricha que coacuhine rijijieen, Cana Coauneraacha jerei que coacuhin, aca jerihane rijijieen ichaohin, inara suujua ilaauchete ichoteratenojoneen neeiche. ³Nitohaneente neriquicheen, esinae rauhijiriin caohacha teraneen niha Cana Coaunerane coitucuhin esenetaain neeichene.

Ajeri neloheriteeuruhane jaan rijicha Curisitone que cuaain acaauru relaa Fedorone.

⁴Nii Cana Coaunera rai ajeri ichaohin nena Jesocurisito, nii chaque nelatihei rijijieen jaolecotin neeuruhalu Isaraelitaa-curune jaancha que coacuhin raaicha nelateen neeuche. Nitohaneen nelatihei rijijieen coaracuruhane sainejeente, ajeri ichaohin jataain itolere que nelatineen janijiin Cana Coauneraacha teratenojoneen nena ne. ⁵Nirijieen techu esinae rauhijiriin aca jerihane rijijieen ichaohichene- ajeri ichaohin nena caje Cana Coaunera lorerineen ichanohin Teenforo rijijieen rai saseredote esine neen Cana Coauneraacha jerei ichajeen saantoneen neriquicheen. Nete inoanlu aichejetocuruha saseredotecurune rijijieen, carenerocuru sohin coichana teraneen nenereicheen. Inarate Jesocurisito aina cuaain Cana Coauneraacha jereineen, rai cachaauru suujuateraneen neriquicheen. ⁶Nitohanerichaaينة:

"Sioon neseune, ajeri jataain nelateinneen nena quicha janijii teun.

Aihana jaun esinae rauhijiriin caohachaniha nii ajeri quicha teine coitucuhin esenetaain nena que chabana jaolecorinaauni,"

naain laenanohineein ne Cana Coaunera Quiricha cuhane.

⁷Cana, esenetaera nichaachene rai nii Cana Coauneraacha tei ajerite jataain nelateineein ne. Nete Cana Coaunera Quiricha cuhane laen nii esenetaelanaala nenacaauru que:

“Jaolecooruha loreri icharaaurune jaan ajerite, loreri nunuheneein temuraneein nerotoha cureein.

⁸Acate leinjiin ajeri jaberoconeein lacurocuruhane jaaneein nereein,” naain laenanohi nihane rijijieeinte, inae lacurocure, nitohaneeuruhane coina inae ichanohineein neeuruhane jaun.

⁹Nete inara le lauriineechene, Cana Curuaanaa rai saserdoteneein niicha janijiineein, Cana Coauneraacha jereineein rai cachaneein neeiche. Nitohaneente inara raain nelu Cana Coaunera, jataain rai caohachaneein nenea niicha beratei beeiche leochaauru raine coina. Acate nocohenaanau nenea rijijieein neeichene jana, inara cotijiaain nelu, rai caohachaneein nenea Cojoanonaa que neeichene coina. ¹⁰Jauriaalu niqai cairichaaajoaain inara coaraain niheilul Cana Coaunera, rai cachaneein neneechene jaun. Nete inae enene rai cachaneein neeichene jaun, inae cairichaaajoaain inara coarae Cana Coaunera.

Cana Coauneraacha icharatei ichajeein ichaaoche

¹¹Canejeraauru, atiin inara suujua coaraain, inae nejelau cachanequichene ichao que ichaaoche, nabana nitajihai inara suujuene coataa. ¹²Cana Coaunera coitucuelanaala nenacaauru aina neeichene nihanatiin, coujurihu Cana Coaunera coitucueraneein neeichene coarateein neeuche. Nitohanein ichaohichenete, baaso ichara niha inara beeuruhane nihanatiin caohacha ichaquichene coaraain Cana

Coaunera coroaecurureein, inae le cachaniquichene caje inaraacha ichanohi rucuhecane cojoanonaa que turuhane bana.

¹³Inae Cana Coaunera cachaneein neeichene jaun, satiin inara amute cachaauru- cocoinanacainein nenacaauru ere tonoraain neeuche. Chaen leochaauru cocoinanacaihuru amuritoheriin cocoinanacainein nenea enferadoro ere tonoraain neeuche. ¹⁴Nii rijijieeinchu nii rai letonocuru- baaso icharaauru casetecaain caohacha ichaeraauru coroaeranein nenacaauru ere tonoraain neeuche. ¹⁵Nitohanein neeiche- nete jere Cana Coaunera, nabana tonaain ereeuruha inara que caohacha ichaera cacha nocoeje chanuheriin ichaonacaauru aina cha coitucuhichuru cachaaurune coataa.

¹⁶Inaraacha jerei ichana nainequiche niqai. Nete laen nii inaraacha ichai aina cuaain naineneeiche leochaauru rai baaso ichaquichene. Aihana jaun coujurihu Cana Coaunera cachaneein caohacha ichaain neeuche. ¹⁷Satiin que inara suujua acatein jiniiquiin ita belaa- jeriha Cana Coaunerane rijijieein neein- enferadoro que inara suujua acatein neeuche.

Cana relaeranu que necairichaaain nihalul Curisitone

¹⁸Nitohanihane jaun rai fatoroon ere tonoraain aca jerihane rijijieein neeine letononeein nenea. Jiaonriha caohachaaain belaaain aca jerihane rijijieein sirihai fatoroone jauhancha nere tonoraain nihane. Nechu aansainein cotaitiin niha fatoroone nihanatiin nere tonoraain neeine. ¹⁹Jerihai Cana Coaunerane rijijieein ichaohacachene coreniha, lera colane rai cacha nihacachene corenihacha cana casetecaain cana cairichaane nihanatiin, jianelanaala abaantaacachenete jataain caohate. ²⁰Jana esinae rauhijiriin baaso ichaquichene coreniha inara casetecaain

neeuruhane abaantaain neeichene, coatiha caohacha ichaa airiheicheein. Nete laen caohacha ichaquichene coreniha, inara casetecaain inara cairichaeranihane, soroelanaala abaantaichene Cana Coaunera notaracaee caohacha ichaa airiquicheein. ²¹Nitohaneein neeichene coinata, inara cotijjaain nelu Cana Coaunera. Inara coreniha necairichanaa abaantaain nihalu Curisito inara que coarateeine rijijieein, inara netonai necairichanaa abaantaain neeuche. ²²Coatiha niqui aansijieeiniji osa que nesaruhin nihei chuni coritaain niheilul Curisito. ²³Niheichu nocoejehanuuruhane nihanatiin coatiha acaauru nocoejehanuhin nerejetohilu. Niheichu cairichauruhane nihanatiin tonaain ereein nerejetohilu. Cana Coaunera esinae rauhijiriin baaso icharaauru coitucuhin nii rucuhecane coinaachate aitoraaetelu. ²⁴Nii Curisitote jaberoco aina cuaain cana osa amaain coroso que ohin aina jiniiquiin cana osa atinaelu, aina cuaain ichaonaa esine que ichaohin osa colane nena coina. Nitohaneinte cana osaacha que nesarujueein nihacachene caje cana mitaeranu que coroso que ohelu Curisito. ²⁵Jaurihaalute niqui aiha beraicha colane nena carenerone rijijieein nitajenaa neein nerejetocoachelu. Nete laen inae ena carenerocuru beraicha beraichane, nitajenaa nainecurenihane rijijieein inara beraain niha Curisitone jaun, nitajenaa naineneeichene jaan ichaonaa que ichaohiche.

**Naaonjoaai ichaauruhine
sinijeraonacaauru.**

3 ¹Aihana jaun inara lanaauru ere tonoraain neeuche enecuru. Aihute inara ichao cajecha coaraain, acaauru rai erenaa latelanaala, nii Cana Coaunera beratenojoin erenaa coitucuhin esenetaain neeuruhine esenetana jerelanaala

nenacaauru inara lanaauru, ²esinae rauhijiriin caohachaaain neein, nii baaso ichaelanaala inara suujua acateein ichaohichene coaracuruhane. ³Esinae rauhijiriin caohachaaain nena jeriquichene, nii nitajenaa inaurera rucuhele oro caje ichanohichuru, cajione caohachaaauru, naaonjoainuri que coacuelanaala, ⁴inara suujua aina cutaain esinae rauhijiriin Jesocurisito suujue que coacuhin neeuchete ratojoeein neeiche. Caohachaaain Cana Coaunera notaracaee nihacanete jataain nelate. ⁵Nii rijijieein techu nerejetocure cana inoaensihuru benecuru- jeriha Cana Coaunerane rijijieein ichaonacaauru. Nitohaneein jeriha Cana Coaunerane esenetaauruhane jaunte, jeriha acaauru lanaaurune rijijieein acaauru ere tonoraain neeurelu nii acaauru benecuru. ⁶Nitohanihane jaun techu: “Canu curuaanaa,” narejete lana Abaraaun rai Sara, nere tonoraain aca jerihane rijijieein nihane jaun. Nii aihalu Sarane rijijieein casilanaala coejelanaala neeichene, rauhijiriin coujuriu nii Abaraaun aina Sara nefoerateneein nena rijijieein neriquicheein.

⁷Jana inara acaauru lananequichene, jeriha inara sinijeraaurune rijijieein jiniiquiin ita suujua rijijieein neeuche. Coa ene neeuruhane amihaneon amurijiriin, inara sinijeraauruhacha ichanenu tein nihache. Inara rijijieein acaauru caohachane quete, nitohaneein acaauru rai ichaonaa tein nelu Cana Coaunera. Aineeichenete Cana Coaunera bajaain neeichene, inara ere tonoraenereein Cana Coaunera.

**Satiin Cana Coaunera ranojoeinein
nenacaauruhacha ichanenu**

⁸Aihana jaun ita suujua rijijieein neein ita janojera rijijieein ita belaaain, leeochoauru coroatajaneein, nii leeochoauru amurijiriin nena coacuela-

naala neeuche. ⁹Jiaonriha tonaain baasoneein inara que ereein neinihane, nii tonaain que baasoneein ereechene. Niheichu inara nocoeje chanuharanihane, coa inara netonai nocoeje chanuhache. Nitohanenaa coacuelanaala acaauru rai caohacha ichacuche. Nitohaneein inara rai caohacha ichaane coina inara raain nihalu Cana Coaunerane rijijieein. ¹⁰Nii cointate:

“Chunocoha nichao colalajiiin raoti ichaonaa que ichaonaa jerihane,

namute cacha que baasoneein erelanaala, nii casajenelanaala,

¹¹baasoneein ichaonacaauru aina nelanaala,

caohachaacha ichaain raotojoeein ichaohane jaanuhacha ariin acaacha sacuhine.

¹²Caná Coaunerate caohachaain suujua coaraain ichaonacaauru beraichaneein nihane jaun,

bajaauruhane aonaain ne.

Nete laen baaso ichajeein ichaonacaauru que

jaoleconaa rijijieein ne,”

naa Cana Coaunera Quiricha inoansi cuhane.

¹³Nitohaneein itolere bana caohacha nejesinaacha que coacuhin neeichene, nerihai inara rai baaso ichara. ¹⁴Nete laen caohacha ichaquichene coreniha necairichanaa coaraqichene nihanatiin rachoojoeein nerausajeein neriquicheein. Jiaonriha nii chuni que casiin nesooneein neeichene. ¹⁵Nesoonenaa coacuelanaala raujiaaincha inara suujua cuhane Cana Curuaanaa Jesocurisito coacuhin bajaebajaecuche. Chaen letona jatoroaain neeuche chunocoha inara caje, “Chatohanihana nii jaecoichene

jaan,” naain bajaa inara cajene, raotojoeein belaaain beeuchete coitucuhin neeine. ¹⁶Nete acaauru amurijiriin nenea coacuelanaala, acaauru que inara suujua acateein acaauru rai beeichene caohachae. Nitohaneein coujuriu Jesocurisito esenetaeraneein caohacha nejesina ichaain neeuchete nocoejecurumiin inara que baasoneein erenacaauru.

¹⁷Baaso ichacaachene coreniha necairichanaa coaracaachene amuritoeriinteja nenacaaneein caohachae caohacha ichacaachene coreniha necairichanaa coaracaachene, nitohaneei jeriha Cana Coaunerane jaun. ¹⁸Nii rijieein techu Jesocurisito netonai lesajeeincha cana osa coreniha cairichanojoeein ohin nelu. Coatiha niqui nii chatohanai baaso ichaain osa que nesaruhin niheilú aca, nete erenaa tonoraelanaala baasoneein ichaonacaauru coreniha necairichaan nelu, rai Inaca Cana Coaunera rene cana amaane coina. Joanreein cacha rijijieeinte niqui ohin nelu rai jaberoco. Nete aca Cana Coaunera suujuenihane jaun oo caje ichanaain enanetojoeein ichaohin ne. ¹⁹⁻²⁰Nitohaneinte suujue nejesineein cuhin, acau tabai itajenojoeein moconajaera casetecanohineein nitajenacaauru suujue relaelu. Acaaurute bote nainaa Nohene reentiaain esenetaauruhane cohaca Cana Coaunerane sainejeein, esenetaurenihane jaun nitajeurelu. Acaauru tabaauru esenetaeraaruhachate, itolereneein fosanejeein acau tabai caje nichoteurelu. ²¹⁻²²Nii acaute cana osa jianein ichaohacachene coina baotisanoinichane jaa cojunacanein nenaanelu. Nii aina cuaainte, inae ichoteratenojoeein nihacache cana netonai. Coatiha raujiaain culuonojoiniha cana jaberocoine coina baotisanojoi

nihacache. Acate raujiaain cana jaberoco coulocohin, oo caje ichanaai dedeeu cuhin Cana Coaunera raotono nichajai que neein, itolere anjeraauru amurijiriin, cocoainanacaihuru amurijiriin nihane coina nenea Jesocurisito aina cuaain, aina nenea coina cana suujue coulooca Cana Coaunerane jaan neein ne.

Cana Coaunera tenojoi inaraacha ichana nainei que leeochoauru coroatajanecuche.

4 ¹Aihane jaun cana coreniha jaberoco cairichaaain nihalu Curisitone rijijieein, inara netonai necairichanaa coaraquichene coina jatoraain neeuche. ²Suujua letono rijijieein ichaohane jianein Cana Coaunera jerenohicha ichaane coreniha necairichanaa coaraain neite osa caje nichotereein. ³Jauriaalute inara netonai aihuruha nii Cana Coaunera coitucuelanaala nenacaaurune rijijieein nerejetocoichelu. Nitohaneechene jaunte, jataain baasoneein ichaohin, inara suujua coaraelanaala necha ansaineein nerejetocoichelu, jianelanaala cocohin, tonijiaain ichaain ajenacaauru aina niha natiin neein, nii ichanohichuru ecaantooruniha natiin corojeein, naaonjoaain nerejetocoichelu. ⁴Nete laen inae enene, chabana jianelanaala baaso ichaain nenacaauru aina ichaoretocoichene jianequichene jaun, inae inara coaracureniha acaauru aina nejaun inara cojoelatiin inae baasoneein inara que ereure. ⁵Nete inae ecu tihane bana onacaauru, ichaohin nenacaauru, naaonjoainuriicha ichai coitucuhin nii rucuheraanu que nenea cojoanona que tihane bana, raajenihane niicha ichai biha cuurureein. ⁶Nii onacaauru raite Cana Coaunera ere berejetecurelu, ohin neuruhane nihanatiin aitha Cana

Coaunerane rijijieein suujue nejesina- neein ichaohin neuruhane coina. Jerichanejeein techu niqui, aitocuruha cachaaurune rijijieein caohacharelu jaiti jaberoconeein neuruhane bana rucuheno- hinihalu niine.

⁷Inae satonoha itolerene que tururichaje. Aihane jaun inara que Cana Coaunera icharatenohin ichajeein Cana Coaunera bajaee bajajeein ichaaoche.

⁸Itolereenein inara suujua aina cutaain jiniiquiin ita belaaain ichaaoche. Jataain ita belaaain ichaoha cachanete arajii rai nosa que suujua acatereein Cana Coaunera. ⁹Inara rene turuhin niha chunine tonaain leeochoauru que erena coacuelanaala inara loreri asaae rauche. ¹⁰Coujuriu lauri lauri inara que Cana Coauneraacha icharatenohi icharaneein nenea tochaneein, ichana nainequichene rijijieein inara rai Cana Coauneraacha tenojoi aina cuaain leeochoauru coroatajanecuche.

¹¹Chunocoha tonaain erena jerihane jaa que irihane, jeriha Cana Coaunerane rijijieein ereein neeine. Chunocoha coroatajanera latihane, ii rai Cana Coauneraacha tei que laraajiin coroata- janeeu. Itolere iicha ichai ichaaine, itolere bana caohachaaain ichaute ii coroatajaniha Cana Coaunera aina Jesocurisitone coaraain coroaecuruhine cachaauru. Acate rai necaohacha que necaohachaaain itolere ichana nainera- neein ne- chariji bana satonoelanaala. Nitohanemiin.

Coujuriu Jesocurisito ranojoneein nenea tochaneein necairichanaa abaantaauche.

¹²Canejeraauru, jiaonriha mainajeein coujunojoneein neriquicheeine que jatoroelanaala neeichene.

¹³Raujiaaincha aihalu Curisitone rijijieein necairichanaa coaraain neeichene nihanatiin rachoojoein

neeuche- inae turuha necaohachane bana rachoojoein neriquicheeine jaun.

¹⁴Curisito cachanein neeichene coreniha inara batohin nei nihanete, nerausiaequiche jataain caohachaa in nena Cana Coaunera Suujue inara aina nihane jaun. ¹⁵Nitohanihane jaun necoejemiin, sonajaain jaohin, asijiaotonein, leeochoaauru rai cotainacai ichaain, naaonjoain ichaane coreniha cairichanojoein nena. ¹⁶Jana Jesocurisito cachanein neeichene coreniha inara casetecaain neinihane, jiaonriha nocoejequichene. Raujiaaincha coreniha Cana Coaunera bajaain corojeein neeuche.

¹⁷Inae cana rai cachanichaachene ichanohi rucuheca Cana Coaunerane cojoanona que turuha. Nitohanein rai cachanichaachene que nunuhetein, nitohanein icharichaa inne jaun, chatohaneurichaa in Cana Coaunera ere tonoraelanaala nenacaauru. ¹⁸Coaracuche nachuhinti rai cacha nichaachene saijiein, necairichanaa coaraain nichoterichaa-cheeine. Nii jaun chatohaneurichaa in chaaanti, nechu aansainein osaona-caauru. ¹⁹Nitohanihane jaun, Cana Coauneraacha jerei ichaquichene coreniha necairichanaa coaraain neeichene nihanatiin, itolere bana caohacha ichajeein ichaohin, naitoonjoa rijjijeein cha ichaeranein nena Cana Coaunera bijiu inara suujue teeuche.

**Jesocurisito ranojoein
nenacaauru suujuatera**

5 ¹Enane laen nii inara aina ita taojieraauru bichauhenaaauru suujua-tenaa jereun. Canuhetonaine acaauru rijjijeein ichauhenanein cana coreniha necairichaa lu Jesocurisitone beranein neeun. Nii rijjijeeinechu canuhetonai acaauru aina jiniiquiin Cana Coaunera Cojoanona que nereeunni, inae ecu tihane

bana. ²Nii inara que Cana Coauneraacha beraichatenojoi, rai cachanein nenacaauru beraihu che. Nii coinate inara que beraichatenajae Cana Coaunera. Caohachaa in inara suujua coaraain jeriha Cana Coaunerane rijjijeein acaauru beraihu che. Jiaonriha inara letoaera latein core coinaacha ichaquichene. Raujiaain jeriha Cana Coaunerane rijjijeein corajeein ichacuche. ³Acaauru curuaanaanein nena coacuelanaala, raujiaain caohacha nejesina ichaain neeichene coarateeuche acaauru quete, acaauru netonai inara caje nerelaaurumii. ⁴Nitohanein neeichenete, inae turuha cana beraicha esinenei nenaane bana, inara que rai necaohacha que necaohachaa in nena-comai lauriareein inara couturi que. Nii comai chariji bana setuhin naasaerinaain.

⁵Jana inara enamanaacuru, jerecuruha inara bichauhenaaaurune rijjijeein neeuche. Satiin ita suujua rijjitojoein ita amurijiriin nena coacuelanaala nii:

“Cana Coauneraate,
itolere amurijiriin nena jereraauru
lacuroaeranein,
cairichanojoein nenacaauru
cairichaa ojaain coaraain
coroatajaneranein ne,”

naain niha erenaane que ninae. ⁶Aihane jaun Cana Coaunera bijihu neein, nii chaque nelatihei rijjijeein neeuche. Acate inae ecu tihane bana jataain nelateinein neeichene caina ichareein. ⁷Coa itolereecha que coacuhin nererojoeaeriin nihache, itolereecha que inara berairichaa in Cana Coaunerane jaun.

⁸Aihana jaun caohachaa in jataain itolere que ninaain neeuche. Charijieein teeinti jatoraa in quihane rai netiin nesari ariirijie janolari, nii rijjijeeinte jatoraa in inara ariirijie

moconajaera inara itajihane coina.

⁹Charijieeinijin chatohanai que inara sarunaa jereranihane, jiaonriha rijitoeichene. Raujiaaincha nii inaraacha esenetai aina cuaain laraajiin, satiin chauratane sacuritaain nenacaauru cana nejeraauru netonai, nii jelai necairichanaa abaantaain neeuruhane coitucuhin abaantaain neeuche. ¹⁰Nete inae carajaojoaain necairichanaa abaantaain neeichene baiha, inara coroatajaniha Cana Coaunerane aina rauhijiriin baaso ichana coacuelanaala laraajiin acaacha esenetaain neriquicheein. Nii jeelai Cana Coaunerate, jataain cana belaitohane jaun, rai calaohi Jesocurisito aina cuaain cana cotijiaain cana raain nelu, rai Cojoanonaa que aina nenea coina. ¹¹Nitohaneein itolere ichana naineraneein neeine chaabana satonoelanaala. Nitohanemiin.

Satono tihane rai nocoiha Fedorone.

¹²Casuujua rijjiejiein nenea cana nejera Siribano quene caa quiricha laenaerateeun inara rai- chaque tonaelanaala inara suujuatiha. Chaen jataain esinae rauhijiriin inara belaiha Cana Coaunerane jaun, coujunacaniha rausiaenojoeiein neeichene jaanu tihane coitucuhichene coina. Aihane jaun jataain inara belaiha Cana Coaunerane jaun, aca jerihane rijjiejiein ichaaoche itolere bana.

¹³Janijiin inara raain nihalune rijjiejiein, Babiloniau janijiin Cana Coaunera ranojoeiein nenacaaurute inara coacue. Cacalabi rijjiejiein nenea-Maroco netonaite inara coacuhe. ¹⁴Ita rene turuhin neeichene, raotojoeiein jiniiquiin ita belaaain ita raain neeuche. Satiin Jesocurisito cachaneein neiniquichene raotojoeiein neeuche.